



## IPA Adriatic projekat: Jadranska modelna šuma

Kao inovativan vid upravljanja prirodnim resursima koncept "Modelna šuma" se pojavio početkom devedesetih godina u Kanadi i od tada se kontinuirano primjenjuje sa ciljem postizanja održivog korištenja prirodnih resursa. Do danas je u svijetu osnovano više od 60 modelnih šuma i pokrenute su mnogobrojne aktivnosti u cilju unapređenja stanja šumskih resursa. U suštini, modelna šuma predstavlja asocijaciju ljudi koji žive na određenom prostoru i koji su zainteresovani za definisanje, promociju i unapređenje ekonomske, društvene i okolišne održivosti toga prostora. Koncept "Modelna šuma" promovise partnerstvo, odgovornost i transparentno upravljanje javnim dobrima, dokazujući da se kroz zajednički rad predstavnika javnog, civilnog i privatnog sektora, uz uvažavanje i razmjenu iskustava i znanja svih učesnika, može postići održivo korištenje šumskih resursa.

Zahvaljujući inicijativi Hrvatskog Šumarskog Instituta, uz podršku partnera iz Jugoistočne evrope i jadranskog regiona, pokrenut je projekat kreiranja modelne šume u jadranskom području pod nazivom "Jadranska modelna šuma" (engl. "Adriatic Model Forest" - AMF). Implementacija AMF projekta se realizuje kroz partnerstvo 10 institucija iz Albanije, Bosne i Hercegovine, Crne Gore, Grčke, Hrvatske, Italije i Srbije, uz finansijsku podršku ostvarenu kroz IPA Adriatic program prekogranične saradnje, sa ukupnim budžetom od 1.675.220 Euro. Glavni cilj ovog projekta je uspostavljenje nove modelne šume na području Dalmacije. Predstavnici šumarskih instituta, šumarskih fakulteta, javnih šumarskih preduzeća kao i predstavnici javne administracije su počeli sa implementacijom AMF projekta u jesen 2012. godine, a prvi međunarodni sastanak i zvanično okupljanje partnera projekta je održano u decembru 2012. godine u hrvatskom gradu Motovunu. Predstavnici partnerskih institucija su tokom ovog sastanka imali priliku da posjete područje na kome je, zahvaljujući saradnji između Istarske županije, Hrvatskih šuma i Hrvatskog Šumarskog Instituta, pokrenuta prva modelna šuma u Hrvatskoj - "Modelna šuma u dolini rijeke Mirne".

Projektom je planirano da partneri podijele svoja iskustva i stečena znanje učestvujući u nizu međunarodnih sastanaka. Posljednji međunarodni sastanak IPA AMF projekta je održan u Sarajevu Bosna i Hercegovina, od 18. do 20. septembra 2013. godine, a imao je za cilj razmjenu iskustava i znanja potrebnih za odabir potencijalnih dionika (interesnih grupa) za pokretanje procesa uspostave modelne šume. Pored međunarodnih sastanaka u okviru implementacije projekta planirana je organizacija niza radionica na kojima će partneri imati mogućnost da usvoje metodologiju za osnivanje modelnih šuma, razvijenu od strane Mediteranske mreže modelnih šuma – MMFN. Osnivanje modelne šume će se realizirati na odabranom lokalitetu na području Dalmacije kroz pet koraka: odabir lokaliteta za buduću modelnu šumu, definisanje radnih grupa, organizovanje radionice za kreiranje strateškog plana i uspostavljanje lokalnog partnerstva, detaljno izlaganje strateškog plana i na kraju podrška implementaciji postavljenih ciljeva u strateškom planu. Implementacija planiranih aktivnosti u AMF projektu bi, do kraja 2014. godine, trebala rezultirati pokretanjem nove modelne šume, druge u Hrvatskoj, koja će okupiti glavne predstavnike svih zainteresiranih strana na lokalnom nivou i poslužiti kao primjer dobre prakse i društveno odgovornog upravljanja šumskim resursima za područje Mediterana. Očekuje se da svi partneri koji

učeštvuju u projektu prenesu stečena znanja kroz implementaciju AMF projekta na lokalni nivo, pokretanjem procesa kreiranja modelne šume u području iz kojeg dolaze.

Više na [www.ipa-amf.eu](http://www.ipa-amf.eu)



Slika 1. Predstavnici partnerskih institucija u projektu IPA Adriatic: Jadranska modelna šuma (foto: I. Kolar)